

Aktivis lobi isu AIDS jadi agenda utama

UM 15 OCT 2003
BANGKOK 14 Okt. — Aktivis anti-Aids akan melobi pemimpin di Sidang Kemuncak Kerjasama Ekonomi Asia Pasifik (APEC) supaya menjadikan isu itu sebagai salah satu agenda utama dalam usaha membanteras gejala yang dihadapi oleh kira-kira 7.2 juta orang di rantau ini.

Para delegasi yang menghadiri Forum Asia Pasifik mengenai HIV/Aids di sini sejak semalam termasuk bekas Perdana Menteri Thailand, Anand Panyarachun, bekas Perdana Menteri India, Inder Kumar Gujral, dan anak perempuan Perdana Menteri, Datuk Seri Dr. Mahathir Mohamad, Datin Paduka Marina.

Delegasi bersetuju untuk melobi pemimpin APEC menggunakan sidang kemuncak itu sebagai komitmen serantau bagi memerangi Aids, kata Dr. Peter Piot, Pengarah Eksekutif UNAids — badan di bawah Pertubuhan Bangsa-Bangsa Bersatu (PBB) mengenai gejala itu.

PBB pernah memberi amaran kepada Asia mengenai kemungkinan berlaku kri-

sis 'Ala-Afrika' di benua ini. Menurut Piot, walaupun Thailand dan Kemboja berjaya dalam kempen anti HIV/Aids, tetapi kurangnya komitmen daripada pemimpin negara-negara lain akan membantutkan usaha itu.

Menurutnya, walaupun Thailand berjaya mengurangkan kadar jangkitan HIV di kalangan kumpulan berisiko tinggi seperti pekerja industri seks, cabaran baru turut meningkat iaitu di kalangan penagih dadah.

Menurutnya, Thailand perlu memberi perhatian kepada kedua-dua kumpulan itu, termasuk memperkenalkan pendidikan seks pada usia awal.

Anand menggesa kerajaan rantau ini melancarkan perang ke atas HIV/Aids bersama perang terhadap dadah.

Pada masa ini, 7.2 juta penduduk di Asia Pasifik menghidap HIV/Aids dan daripada jumlah itu 600,000 di negara ini, menurut data UNAids. — *Utusan*